



**KENYATAAN MEDIA**  
**DATO' MENTERI BESAR SELANGOR**

**SELANGOR MEMPERKUKUH DAN MEMPERKASA WANITA MELALUI JARINGAN  
KEPIMPINAN DAN KERJASAMA STRATEGIK**

1. Kerajaan Negeri Selangor melalui agensi Wanita Berdaya Selangor telah menganjurkan Majlis Townhall x Raya Wanita Negeri Selangor bersempena Penutup Sambutan Hari Wanita Antarabangsa 2026 untuk merapatkan hubungan dan memperkasakan pimpinan kerajaan negeri dengan penggerak-penggerak wanita di akar umbi.
2. Penganjuran program ini mencerminkan komitmen berterusan Kerajaan Negeri untuk memperkukuh agenda pemberdayaan wanita, kepimpinan komuniti dan pembangunan sosial yang inklusif, selaras dengan aspirasi negeri untuk membina Selangor yang berdaya huni, makmur dan berpaksikan pembangunan insan.
3. Program ini telah menghimpunkan seramai 500 peserta yang terdiri daripada alumni program pemerkasaan wanita, pemimpin wanita komuniti, pembuat dasar dan rakan strategik. Platform ini berfungsi sebagai ruang dialog dua hala, penyelarasan hala tuju serta pengukuhan jaringan antara pemimpin wanita di peringkat negeri dan akar umbi.
4. Kerajaan Negeri melihat wanita bukan sahaja sebagai penerima manfaat dasar, tetapi sebagai rakan pembangunan strategik, penggerak ekonomi keluarga, pemimpin komuniti dan pembentuk daya tahan sosial negeri. Justeru, usaha memperkukuh jaringan wanita melalui pendekatan libat urus seperti ini amat penting bagi memastikan penyampaian dasar dan inisiatif negeri lebih tersusun, inklusif dan berimpak tinggi.
5. Sebagai sebahagian daripada pengisian strategik majlis, turut diadakan Sesi Pemeteraian Memorandum Persefahaman (MoU) antara Wanita Berdaya Selangor (WBS) dan Taylor's University bagi pelaksanaan Program IbuNiaga, sebuah inisiatif pembangunan keusahawanan yang menyasarkan wanita B40 melalui latihan berstruktur, bimbingan dan penyelidikan terapan. Inisiatif ini selari secara langsung dengan Dasar dan Pelan Tindakan Wanita Selangor 2024-2026, khususnya dalam usaha membuka lebih banyak laluan kepada wanita untuk menjana pendapatan, membina daya tahan keluarga serta meningkatkan mobiliti sosial.

6. Selain itu, turut dimeterai Memorandum Persefahaman (MoU) antara WBS dan The Asia Foundation bagi pelaksanaan Program Latihan Penjagaan, yang memberi tumpuan kepada peningkatan kemahiran, perluasan peluang ekonomi dan profesionalisme sektor penjagaan. Inisiatif ini selari dengan Dasar Ekonomi Penjagaan Negeri Selangor 2024–2030, yang mengangkat penjagaan sebagai sektor ekonomi bernilai tinggi dan tanggungjawab bersama seluruh masyarakat.
7. Kedua-dua kerjasama strategik ini membuktikan pendekatan Kerajaan Negeri yang menumpukan kepada pembangunan ekosistem wanita secara menyeluruh, daripada aspek kepimpinan, keusahawanan, kemahiran masa hadapan hinggalah kesejahteraan komuniti dan keluarga.
8. Negeri Selangor kekal komited untuk memastikan lebih ramai wanita berada dalam ruang kepimpinan, ekonomi dan pembuatan keputusan demi membina masa depan negeri selaras dengan aspirasi Kerajaan Negeri untuk membina Selangor sebagai negeri Pintar, Berdaya Huni dan Makmur, dengan wanita sebagai rakan pembangunan strategik dalam memacu kesejahteraan sosial dan kemajuan ekonomi negeri.

**YAB DATO' SERI AMIRUDIN BIN SHARI**

31 Mac 2026